

Abraham Kriel

Soms word daar 'n kind gebore sonder dat mense kan raai hoe ver daardie kind se invloed eendag gaan strek en hoeveel ander kinders se lewens hy gedurende sy eie lewe gaan aanraak. So 'n mens was **Abraham Kriel** - iemand wie se positiewe invloed baie lank ná sy dood steeds voortleef.



So begin sy lewe

Abraham Paul Kriel is op 1 Maart 1850 op die plaas Keerwater in die Franschhoekdistrik gebore. Hy was een van 13 kinders van sy ouers - Jacobus Petrus Kriel en Margaretha Louise Hugo. Sy pa was 'n wynboer en ook 'n parlamentslid. Net soos twee van sy broers, het Abraham ook 'n predikant geword.

Hy was getroud met Christoffelina Cornelia Pietersen en hulle het twee seuns en 'n dogter gehad. ¹



Ds. Kriel en sy gesin

Die saadjie vir liefdadigheidswerk word gesaai

Abraham Kriel het in Franschhoek en Stellenbosch skoolgegaan. Van 1877 af het hy aan die **kweekskool** in Stellenbosch gestudeer en aan die einde van 1880 is hy as predikant in die NG kerk gelegitimeer (as predikant aanvaar). Sy eerste gemeente was in Jansenville en vanaf Julie 1881 was hy predikant in die Dutoitspan-gemeente by Kimberley se diamantvelde.

Hy het hier baie aandag gegee aan **sending-** en **liefdadigheidswerk** onder [arm](#) mense. Hy het **maatskaplike** werkers onder toesig van die kerk aangestel en het ook 'n hotelgebou gekoop wat hy in 'n jeugtuiste omskep het. Om meer te wete te kom, onderneem hy 'n oorsese reis en besoek 'n hele paar kinderhuise in Brittanje

asook 'n tuiste vir mense met epilepsie (ook bekend as vallende siekte) in Duitsland. ¹



Langlaagte word sy tuiste

In Junie 1893 word hy die eerste predikant van die gemeente wat toe Witwatersrand-Wes genoem is en later Langlaagte sou word.

Hy stel twee maatskaplike werkers in Fordsburg aan en begin reeds vanaf 1894 met planne om **wees**- en hawelose kinders (kinders sonder ouers en/of huise) te versorg. Sy gemeente aanvaar in 1899 die verantwoordelikheid om vir twee dogtertjies te sorg en die **ring** van Potchefstroom ('n groep kerke in 'n sekere omgewing staan as 'n 'ring' bekend) gee die verantwoordelikheid van die versorging van weeskinders vir hom. ¹



Weeskindertjies

Die oorlog onderbreek sy werk

Toe die [Anglo-Boereoorlog](#) op 11 Oktober 1899 uitbreek (begin), het hy as prediker saam met die **Boeremagte** (die Boere se soldate) rondgetrek.

Hy was tot aan die einde van die oorlog saam met generaal Lucas Meyer in Natal, saam met generaal [Christiaan Beyers](#) in Noord-Transvaal en saam met kommandant Jan Naudé in Noordwes-Kaapland. ¹



Forsburg se NG kerk beskadig in Braamfonteinse ontploffing, 1896

Die Langlaagte-kinderhuis

Toe die oorlog verby is, is die kerk wat hy in Witwatersand-Wes begin bou het, klaar. Daar is toe ook besluit om 'n kinderkuis in Langlaagte te bou vir die kinders wie se ouers in die oorlog dood is of wat in die konsentrasiekampe gesterf het.

Hierdie kinderkuis het op 4 September 1902 met sewe kinders begin. Voor die einde van 1902 was daar 92 kinders en toe die kinderkuis een jaar oud was, was daar reeds 245 kinders.

Daar is meer erwe en huise gekoop om die kinderkuis groter te maak. In 1907 is die **hoeksteen** vir 'n groot gebou vir meisies gelê (dit beteken dat die bouwerk aan die gebou begin het). In 1913 is twee plase vir die kinderkuis gekoop om dit verder te vergroot. Daar is ook begin om vir die kinders onderrig in verskillende vakke te gee. ¹

Die kinderkuis het nie 'n vaste inkomste gehad nie, maar kon altyd voortgaan met die werk om die kinders te versorg.



Inwoners van die kinderkuis
pryk op die voorblad van
Huisgenoot ,1960

Ds. Kriel het die kinders van die begin af nie net in die gewone skoolvakke te laat onderrig nie, maar ook in **ambagte** soos steenwerk, kleremaak, skrynwerk (houtwerk) en loodgieterswerk. Kinders is op die kinderkuis se plase Moria, Hartbeestfontein en Vierling ook in boerdery opgelei. ²

Abraham se gesondheid was vanaf 1909 nie meer goed nie. Maar ten spyte daarvan het hy weer na die buiteland gereis om na kinderkuise in Brittanje en Nederland te gaan kyk en te sien hoe hulle dinge daar doen.

In Februarie 1918 het hy as predikant van Langlaagte afgetree, maar steeds direkteur van die kinderkuis gebly. ¹

Abraham Kriel as mens

Ds. Abraham Kriel word deur mense wat hom geken het, beskryf as 'n man wat opreg, nederig en beginselvas was. Hy het ook uitstekende praktiese **vernuf** gehad. ¹

Aan dr. [William Nicol](#), wat van 1913 tot 1938 leraar van [Johannesburg-Oos](#) was, het ds. Kriel op 'n keer gesê: “Ek dank die Here dat ek gehoorsaam was, maar vol geloof was ek ongetwyfeld nie. Telkens as ek vir myself sê dat ek moet glo, word ek bang. Maar as ek sommer in gehoorsaamheid die oë toemaak en my opdragte aanpak, sorg die Here dat alles regkom.” ²

Kinderhuis se invloed strek ver

Abraham Kriel en die Langlaagte-kinderhuis se invloed het ver uitgebrei.

Ná die stigting van die Langlaagte-kinderhuis in 1902, het [Maria Kloppers](#) in 1908 'n veilige tuiste geskep vir babas wat haweloos (sonder huise en versorging) gelaat is. ³ Dié kinderhuis se naam was Die Maria Kloppers Kinderhawe. ⁴

Ds. J.M. Louw van Boksburg en ds. A.P. Burger van Middelburg (in die destydse Transvaal, vandag [Mpumalanga](#)) het die voorbeeld van Langlaagte gevolg en in Oktober en November 1902 ook kinderhuise gestig. Die kinderhuis op Boksburg is in 1904 en die een op Middelburg in 1908 by die Langlaagte-kinderhuis ingelyf. ²



Maria Kloppers

In 1956 is 'n afdeling van die Langlaagte-kinderhuis in Potchefstroom gestig. Hierdie kinderhuis het naderhand onafhanklik van die oorspronklike kinderhuis begin funksioneer. ⁵

Die kerkraad van die NG gemeente in Nylstroom (vandag Modimolle) en die munisipaliteit van die dorp het besluit om 'n Abraham Kriel-kinderhuis in Nylstroom te begin. Die bouwerk het in 1958 begin en die eerste kinders is in 1959 in die kinderhuis opgeneem. ⁶



In 1979 het Jan Hofmeyr die Emdeni-kinderhuis in Soweto gestig.

In 1995 is die eerste satelliethuis van Abraham Kriel-kinderhuis in Linden, Johannesburg gestig. So 'n satelliethuis is 'n gewone huis in 'n woonbuurt wat steeds onder die beheer en beskerming van die kinderhuis funksioneer. Tussen 1998 en 2003 is nog ses sulke satelliethuise gestig. ⁵

In 2003 het die Johanna Malan Vroeëkinderontwikkeling-sentrum deel van die Abraham Kriel-groep geword om te voorkom dat dit sou moes sluit. In 2006 is daar begin om gespesialiseerde sorg vir **getraumatiseerde** kinders by die Langlaagte kampus te gee. ⁵

Hul dienste is vandag nie net huisvesting nie en sluit nou ook hierdie projekte in:

- Emdeni Vaardigheidsentrum vir jeugdiges ouer as 18.
- Gemeenskapsorgprogram waardeur kinders sonder ouers en ander weerlose kinders versorg word waar hulle by familieledede woon;
- *Die Johanna Malan Vroeëkinderontwikkeling-sentrum;*
- *The Steinhoff Extended Family Programme for HIV/AIDS Infected and Affected Children.* Hierdie program fokus op gesinne waar minderjariges aan die hoof van die huishouding staan; ⁷ en
- In 2008 word die Impact School op die Langlaagte kampus ge-open. ⁸

In die eerste 100 jaar van die kinderhuis se bestaan, het 13 000 kinders hier versorging gekry. Baie het ál hul kinderjare daar deurgebring. Vir duisende kinders is hierdie die enigste huis wat hulle ooit geken het. ⁷

'n Monument vir Abraham Kriel

Die "pa" van soveel kinders is op 9 Junie 1928 in Natal oorlede. Hy was aan die einde van sy lewe heeltemal verlam. Ná sy dood is die naam van die Langlaagte-kinderhuis verander na Abraham Kriel-kinderhuis. Daar was toe 600 kinders in die kinderhuis. Hy sal bly voortleef in die kinderhuise wat steeds sy naam bly dra.



Abraham Kriel se grafsteen, Langlaagte

Woordbank

ambagte	'n Ambag is 'n soort handwerk wat mens leer doen, soos byvoorbeeld 'n timmerman of 'n skoenmaker.
Boeremagte	Die Boere se soldate.
dinamiet	'n Ontploffbare stof wat onder meer gebruik word om rotse mee stukkend te skiet.
getraumatiseerde	'n Getraumatiseerde mens is iemand wat deur 'n baie slegte ondervinding gegaan het, byvoorbeeld 'n ernstige ongeluk of 'n voorval van geweld.
hoeksteen	Die eerste steen van 'n gebou wat gelê word; fondamentsteen, fondamentklip.
kweekskool	Opleidingskool vir iemand wat 'n predikant wil word.
liefdadigheidswerk	Om mense wat minderbevoorreg is, te help.
maatskaplike	Hulpverlening en leiding aan gesinne in die gemeenskap wat ekonomiese/ geestelike/of ander probleme het.
ring	Kring/liggaam waarin kerklike gemeentes verdeel word.
sending	Evangelisasiewerk, die Woord bedien.
vernuf	Die vermoë om iets goed te kan doen.
wees	'n Ouerlose kind. ⁹

Lees meer oor Abraham Kriel

- [Abraham Kriel en die mense van Langlaagte.](#)

Video's

Kyk na die Liggiefees by die Abraham Kriel-kinderhuis in Potchefstroom.

Agtergrond oor die Abraham Kriel-kinderhuis.